

**Anwar: Saya ada cara sertai BERSIH 2.0**  
**Malaysiakini.com**  
**July 9, 2011**

Ketua Pembangkang, Datuk Seri Anwar Ibrahim menegaskan beliau akan turun bersama rakyat dalam himpunan BERSIH 2.0 hari ini.

Anwar berkata beliau mempunyai cara dan akan hadir ke Stadium Merdeka serta menyokong himpunan awam berkenaan.

"Saya nak ke Stadium Merdeka esok (hari ini). Adalah caranya nak ke situ," kata beliau kepada hadirin pada program tazkirah perdana di Bandar Tun Razak di Kuala Lumpur malam semalam.

Anwar merupakan antara 91 individu yang dilarang polis berada di tempat tertentu di pusat bandar Kuala Lumpur hari ini.

BERSIH 2.0 telah diisytihar sebagai pertubuhan haram dan diasak oleh kerajaan BN dengan menggunakan polis dan akta-akta 'kuku besi' seperti Akta Ordinan Darurat 1966 sehingga lebih 200 individu telah ditangkap atau didakwa.

Pada cermahnya, Anwar juga mengimbau surah Al-Kahfi yang menceritakan kisah anak muda yang diberi bantuan Allah kerana menolak kezaliman pemerintah.

Anwar turut menyatakan kekaguman dengan anak muda yang berani memperjuangkan hal keadilan dan yakin dengan perhimpunan ini, rakyat akan menyedari kezaliman Umno-BN.

"Kita bukan hamba, kita orang merdeka. Ini kemahuan anak muda kita," katanya.

Copyright © 1999-2007 Mkini Dotcom Sdn. Bhd  
<http://www.malaysiakini.com/news/169376>